

Ekainaren 10ean  
**URTEAN ZEHARREKO 10. IGANDEA**

### Agurra

Gure bihotza Jainkoa maitatzera zuzentzen duen Jauna izan bedi zuekin.

### Sarrerako oharpena

Igande on, senideok!

Kristorekin, bere irakaspenarekin erne eta leial bizi nahi dugu Jaunaren Egun dugun igandean. Bere Hitza eta Eukaristiako ogia ditugu janari eta indar emaile gizakion egun ere ba dugun igandean.

### Damu-otoitza

Senideok: Jesusek bere heriotza eta piztueraren bidez, barkamena eta bakea lortu dizkigu. Pazko-misterio hau ospatzen hasi aurretik, eska dezagun Jaunaren barkamena.

- Jesus Jauna, gu salbatzeagatik gizon egina: erruki, Jauna.
- Jesus Jauna, guri bizia emateko hil eta piztu zinena: Kristo, erruki.
- Jesus Jauna, gu Aitarengana eramateko zerura igo zinena: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizitzara

### Otoitza

**On guztien iturri zaren Jauna,  
 entzun gure otoitza:  
 zure argiak argi egin diezagula, zuzen dena ezagutzeko,  
 eta zure laguntzak indar eman, betetzeko.**

**Zure Seme Jesu Kristo gure Jaunaren bitartez,  
Zurekin eta Espiritu Santuarekin batean  
Jainko eta Errege bizi baita gizaldi eta gizaldietan.**

### **Hitzaren liturgiari oharpena**

Errudun garenean edota hanka sartu dugunean, geure ardua aitortu ordez aitzakia bila jarduten gara askotan. Jainkoak gure salbamena nahi du, gure lankidetzarekin: bihotz-berritzeko eta gaitzaren aurka jarduteko deia egiten zaigu. Jainkoa gure alde ari da, bere nahia betetzea dagokigu guri.

### **Lehenengo irakurgaia** (*Gn [Has] 3, 9-15*)

Genesis liburutik

Jaungoiko Jaunak gizonari dei egin zion eta honela esan zion: «Non zara?» Eta hark erantzun: «Baratzean ibiltzen sumatu zaitut eta, larrugorri nengoelako, beldurrez, gorde egin naiz». Jaunak orduan: «Eta nork esan dizu, larrugorri zeundela? Jatea galarazi nizun zuhaitzetik jan al duzu?» Gizonak erantzun: «Lagun ipini didazun emakumeak eman dit hartatik, eta nik jan». Orduan Jaungoiko Jaunak esan zion emakumeari: «Zer egin duzu?» Emakumeak erantzun: «Sugeak atzipetu nau, eta nik jan».

Orduan Jaungoiko Jaunak sugeari esan zion: «Hori egin duzulako, madarikatua izango zara abere guztien eta landako piztia guztien artean; sabel gainean ibiliko zara narrastaka; zure bizitzako egun guztietan hautsa jango duzu. Haserrea sortuko dut zure eta emakumearen artean, zure jatorriaren eta harenaren artean; honek buruan emango dizu, zuk orpotik helduko diozunean».

**Erantzun-salmoa** (*Sal 129, 1-2. 3-4. 5-6. 7-8*)



Barnetik Zuri dagizut oihu, Jauna,  
entzun, Jauna, nire mintzoa.  
Beude erne zure belarriak,  
nire oihu eskarira. R/.

Gure erruak gogoan badauzkazu, Jauna,  
nor dagoke zutik, Jauna.  
Baina barkamena Zugan daukazu,  
Zu begirunez zerbitza zaitzagun. R/.

Jaunagan itxaroten nago,  
nire barrena Haren hitzaren zain dago.  
Gau-mutila goiz-argiaren zain dago:  
Nire gogoa Jaunaren zain dago. R/.

Gau-mutila goiz-argiaren zain dago:  
Israel Jaunaren zain hala bego.  
Jaunagan baitago errukia, ‘  
Harengan askatasun ugaria;  
Berak utziko du Israel askaturik, ‘  
egin dituen hoben guztiatik. R/.

### **Bigarren irakurgaia** (2 Ko 4, 13–5, 1)

San Paulo Apostoluak Korintoarrei

Senideok: Liburu Santuak honela dio: «Sinetsi dut, eta horregatik hitz egin dut». Eta guk ere sinesmen espiritu bera dugularik, sinesten



*Markosen eskutik Jesus ezagutzuz*

Eguberri-jaien ondoren hasi genuen “urtean zeharreko igandeen” zerranda, eten egin genuen Garizuma eta Pazkoaldia ospatzeko. Orain, igande haien zerranda jarraitzen dugu, Urtean Zeharreko hamargarren igande honekin.

Markosen ebanjelioa irakurriko dugu Urtean Zeharreko igandean, gehienetan. Badakigu, Markosek idatzi zigun ebanjelioa lauetan gordinena dela; azaltzeko eta ulertzeko neketsua. Baina Markosen ebanjelioa da Nazaretoko Jesus gizon harengana garbien hurbiltzen gaituena. Bestalde, misio-kutsu handia du ebanjelio honek. Markosen ebanjelioa bere egin ez duenak, ez du Jesusen mezua sakontasunez jasoko. Merezki du, beraz, ebanjelio horretara hurbiltzen ahalegintzeak. Ez zaigu damutuko!

Sei zatitan bana dezakegu Markosen ebanjelioa. Garizuma aurretik, lehendabiziko zatia irakurri eta hausnartu genuen. Gaurko honekin, bigarren zatia hasi dugu: hamabi apostoluen aukeratzea eta misiora bidaltzea izango da bigarren zati honen mezu nagusia.

Eta ohar hauek eginda goazen gaurko ebanjelio zatira. Hor ikusten ditugu, alde batetik, Jesus Jauna eta bere ikasleak... eta etsaiak eta jende-talde bestetik. Eta bi motatako etsaiak ditu Jesusek aurrean: bere ahaideak eta Jerusalemgo idazlariak. Hona Markosek dakarren detailea, benetan harrigarri gertatzen dena: Jesusen ahaideak eta Jerusalemgo idazlariak elkarrekin Jesusen eta ikasleen aurka. Horrek zer pentsatua ematen digu!

Ebanjelariak garbi uzten digu, Jesusi senitartekoek ere ez diotela ulertu. Kontra jarri zitzaizkion: “Burutik eginda zegoela uste zuten, eta ez zeuden familiaren izen ona galtzen uzteko! Beren etxe eta herrialdera eraman nahi izan zuten. Pentsatu eta erabaki dute: dagoeneko etxe-atarian ditu bere ama eta senideak...

Pentsa dezagun. Irudikatu Jesusen keinuak, hitzak eta bereziki Haren aurpegia. Serio baina irmo esan zuen: Zein dira nire ama eta nire senideak? Eta inguruan eserita zeudenei begiratu, honela esan zuen: “Zuek zarete nire ama eta senide, Aitaren nahia eginez gero”.

Jar nadin Jesus Jaunaren aurrean, eta egin dezadan otoitz honela: “Jauna, hemen naukazu zure aurrean, naizen bezala agertzeko beldurrez. Zugandik ezkutatu nahirik. Baina ez, emadazu kemena nire lotsak eta beldurrak argi eta garbi ikusteko eta zuzentzeko. Ez nadila errua besteri ezartzen aritu, zure begirada garbiak atera nazala neure burua engainatzetik”.

Galdeiozu zeure buruari: saiatzen al naiz bataioko hitza betez, egunero Aitaren nahia betetzen? Edonon agertzen al naiz Jesusen taldeko, fededun bezala? Ez ote daukat Jesus, burutik egindakotzat? Kristau jokabide asko ez al ditut erokeriatzat hartzen? Zer iritzi dut dena utzi eta Jesusi erabat jarraitzen diotenei buruz?

### **Jainkoaren herriaren otoitza**

Senideok: egiogun otoitz Aita errukitsuari, Kristoren Espirituak gure bihotzean isuri duen seme-alaben konfiantzarekin:

- Frantzisko Aita Santuaren alde: Eliza osoaren Gotzain aukeratu zuen Jainkoak zoriona eman diezaion, eta Bere herri santua gidatzeko babes dezan. Eska diezaiogun Jaunari.
- Gure herriaren alde eta bertako agintarien alde, herri guztien alde eta arduradun guztien alde: egiazko bakea bidera dezaten Jainkoaren argitasunez eta laguntzaz. Eska diezaiogun Jaunari.
- Bihotz-berritze bidean direnen alde, bataiorako prestatzen direnen alde edota haurrak bataiatzeko prestatzen direnen alde: Jainko gure Jaunak, sakramentuen bidez, bere errukiaren atea zabal diezazkien, Kristoren bizitza berrian sar daitezen. Eska diezaiogun Jaunari.

—Gaixoen alde, Jainkoak beraien otoitzak entzun ditzan eta bizi dituzten zailtasunetan bere errukiaren gozoa eskain diezaien. Eska diezaiogun Jaunari.

Aita guztiz santua, gu bekatutik askatzeko bidali diguzu Zure Semea; entzu iezaguzu, arren, eta sendo gaitzazu fedean, gaitz guztien aurka lan eginez Kristoren garaipenean parte izan dezagun. Errege bizi baita gizaldi eta gizaldietan.

### **Jaunartze-ondorengo otoitza**

**Jainko guztiz ona,  
Zuk emandako sendabide honek  
geure gaiztakerietatik atera gaitzala  
eta bide zuzenera eraman.  
Jesu Kristo gure Jaunaren bitartez.**